

**Arferit angisuut nunatsinnut pisassiissutaasartut tamakkerneqarneq ajornerat pillugu aammalu tamakkerlugit pisarineqannginnerannut aporfiusartut qanoq iliuseqarnikkut piarneqarsinnaanersut pillugu Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiaq kingusinnerpaamik UKA2020- imi saqqummiunneqartussanngorlugu.**  
(Nikkulaat Jerimiassen, Siumut)

### **Akissuteqaat**

(Aalisarnermut, Piniarnermut Nunalerinermullu Naalakkersuisoq)

### **Siullermeerneqarnera**

Naalakkersuisuniit siunnersuuteqartumut Nikkulaat Jeremiassen, Siumut, siunnersuuteqarneranut qujavugut UKA saqqummiunneqartussaq arferit angisuut nunatsinnut pisassiissutaasartut tamakkerneqarneq ajornerat pillugu aammalu tamakkerlugit pisarineqannginnerannut aporfiusartut qanoq iliuseqarnikkut piarneqarsinnaanersut aammalu maannakkumut inatsisaasut malillugit arferit angisuut pillugit aqutsinermi allannguisoqarsinnaanermut siunnersuusiortoqarnissaa pillugu Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuuteqarpoq.

Inuiaqatigiinni Kalaallit Nunaattut ittumi, ukiut tamaasa pisassiissutaasut atorluarneqartarnissaannik soqutiginnittorpassuaqarpoq. Tamannalu imminut annertunerusumik pilersulernissamut pingaaruteqartorujusuvoq.

Siunnersuuteqartup ilaatigut oqaatigaa uumasut imminnut nerisareqatigiinnerannut uumasut assigiinngitsut akornanni ajoqusiinissaq ernummatigalugu, Kalaallit Nunaanni aalisakkat aalisarneqartut ilanngullugit. Kiisalu Kalaallit Nunaanni piniariaatsitta sunillu nerisaqartuarsimanitta attattuarnissaat aammalu piujuaannartitsinermik tunngaveqartumik piniarneq tunngavigalugu neqinik imminut pilersorsinnaanerup qulakkeerneqarnissaa.

Naalakkersuisuninngaanniit oqaatigineqartut tamarmik pingaartinneqarput aammalu tunngavissat allat tunngavigalugit Kalaallit Nunaanni arfanniarneq nalilersortissinnaallugu.

Nalunaarusiortoqarnissaanut minnerpaamik makku nalilersorneqarnissaat pisariaqassaaq:

- Maannakkumut angallatinit qamutililinnit piniarnermi aporfiusartut misissorneqarneri, ilaatigut inuussutissarsiutinik allanik pingaarnertutitaqarneq, soorlu aalisakkanik killilersukkanik aalisarneq,
- Angallatit qamutilillit aammalu piffissap ilaani umiatsiaaqqat qoorortuut atorlugit piniartartut misissorneqarneri,
- Suliffissuaqarfiit, inuussutissarsiorfiit akuerisaasut kiisalu inuussutissanik tunisassioqartut (primærproducenter),
- Pilaffiit akuerisaasut pillugit allattorsimaffik,
- Maannakkut piniariaatsit akillu inissisimaffii piffissamut qaangiussimasumut sanilliunneqarneri

- Angallammik arfanniummik inissiinissamut imminut akilersinnaaneramik aamma tamakkiisumik arfernik angisuunik piniartarneq imminut akilersinnaanersoq misissuineq.

Tungaviusumik Naalackersuisut siunnersuutigineqartumut isumaqataapput, isumaqarlutalu misissuisoqaqqittariaqartoq, tungaviusumik arferit angisuut piniarneqartarnerini aqutsinermi allannguisoqannginnerani. Nalunaarusiamik taamaattumik taamalu annertutigisumik suliaqartoqarnissaanut suleqatit, kiisalu avataanersut nalunngisaannik pissarsinissaq pisariaqartinneqarpoq.

Naalackersuisut taama oqaaseqarluta siunnersuutigineqartup akuerineqarnissaa inassutigaarput.